

Naskanyam Timote Leta

Polimna İriki Naskanyam

Timotem pilwa Leta

Isipkita Yitkak

Onggityam Naskanyam Timote Leta irika riga re Polte. I ton itemb leta yirikonj tina gar ke utkunda ke b'iga Timotem pilwa na. Timote ade ukendonj Listra taun wa, i ti b'u re Grik riga na aji ti mog re Ju kongga na yepiya re tin kesam yina peba youyaenenonda b'iga sobijogind.

I opimemb kwa ninda Polimna iriki leta, opi re naskanyam Timote, Nı̄mogim Timote, i dide Tito, onggityam nowa leta agenaeranj re pasto wiko gatab leta kaim. Mop nokıp opimemb leta yitnono aenanj re pasto riga waina wiko gatab wumır okatenam mim dide sosi wingirind siram b'irari kesa omnı̄kam mile gatab mim. I ket Timote Pol kima yikonj, re Pol nı̄mogim menon yokatenonj misnari wı̄kom. I ton ket Polind yım okaena yiyeñonj sosi wiko omnı̄kam. I re Timote Epeso taunind sosi riga ouyaena eyeninonj dide sosi wı̄p yomnenonj, Pol temb leta ti yirikawonj.

Si Timote re sisil riga na ngai yibnonj odede ukojog wiko it re sosi wı̄p omnennam. Si onggit penaemb Pol Timotem leta yirikawonj. I ket onggit letand Pol Timotem ninda yım b'akawa yit dide yimak yit yogoniny tina sosi wiko gatab. I kwa Pol nonony yomneny b'anyginena ouyaena riga wa gatab dide towaina ouyaena

gatab. Nokip b'anyginena ouyaena rigap opima Godimna yitkak askamkenenanj. Pol re ma sobijog na Timotend yir itena yiyanonj, si odedep Pol Timotend yimak yit yagoniny ridede wip e Godimna riga awowim.

Simesime Yitkak

¹ Simesime! Kon Pol re Keriso Yesumna itmikitijog riga en. Si mera yirkokar okawayam God dide mera warim b'ogil isma okatam riga Keriso Yesu, Tonpiya ken ningawonda onggityam nyi okatam.

² Si kon ite re leta yiriken re gar ke utkunda ke koina iminjog b'iga Timote mor pilwa e. Si Abu Godim pilke dide mera Yonggyam Keriso Yesum pilke wurar i kear i dide ngimbla man kima.

B'anyginena Ouyaena gatab Nonony Yitkak

³ I re kon Makedoniya eriya wa nekond, kon men mugowond demb de Epeso taunind wimenam, nokim da idenat man ninda b'anyginena ouyaena riga tengaeninyit iswangam da goro sosi riga rauyaeninem b'anyginena ouyaena nya ke.

⁴ I kwa ten tengaeninyit da goro ton kupkakupka nonykok b'akaeninem kakyit wa dide dad ke b'usmureni riga nyi gatab yit wa. Mop nokip onggityam yitip abgendenanj re yit b'ugwatena mile nena im, aji odede yitip ma ita Godimna wiiko oranga yiyi, nokip God ma wiiko omnikam re gar ke utkunda nena kae.

⁵ Si kon onggityam b'ingawa yit gatab mingaen re nok paemb ji da ton singi b'iyena mile omnikam yeyene rinte re opekeneny kilkip kesa gar ke, i

b'ogil kukipind nonykok ke, i dide b'anyginena kesa gar ke utkunda ke.

6 I ninda ouyaena rigap re opima onggityam mop esungaya yiyyenyi, i ket kip kesa yit b'usenenand dide yit b'ugwatenand kinyir aena wuweny.

7 Si ton singi aena wuweny re gog yit ouyaena riga awou mim, aji ton ma wumir im nangga gatab im ton yitnono aenanj i dide nangga yit im ton emjatenanj.

8 Aji men wumir im da ra yipa rigat onggityam gog yit Godimna singind dimdim nya ke ingaeny, si itemb gog yit re b'ogiljog e tinim.

9 I men b'ogla nonyind yawamu da gog yit re ma negir kesa dimdimjog riga wanim oramiti e, aji towanim mim, opi re gog erbeka riga dide negirjog mile riga, i Godind ewangaya kesa riga dide negir mile riga, i yina omni kesa riga dide yina mile kilkil omnika riga, i b'u ake mog onganda riga dide riga onganda riga,

10 i yigyig b'iyena riga, i riga ke riga o kongga ke kongga b'iyena riga, i wiko riga osoga riga, i b'anyginena yit opurena riga, i b'anyginena nya ke God ma nyi kima yit tirir omna riga, i dide kwa ninda riga yepim re Godimna iminjog dimdim yitkak kak eaenanj.

11 Si itemb yitkak pita awonj re God ma b'ogil yirkokar bage yitim pilkena. I b'ogil God ket ken nony nijawonj onggityam b'ogil inyomarena kima yitkak pitapita omnenaam.

12 I kon mera Yonggyam Keriso Yesund siteket yȋt omnena yȋyenÿin yet re kor danda nokawonj kornim Tina wȋko omnikam. Mop nokip Ton ken nony nijawonj Tina b'ogil yirkokar bage yȋt pitapita omnena dide ket nogenonj onggityam Tina wȋko pȋpmetind oramitam.

13 I naskand kon nibnond re Keriso Yesund isadrena riga na, i kon Tina sosind bebig kȋma b'idgotnena aramkeneninond dide ket nenegir kana itemb sosi yomnikenenond. Aji Yesu kea ken kear nomnonj, nokip kon odede mile amnikeninond re wumir kesa mapena dide gar ke utkunda kesa mapena.

14 I mera Yonggyamimna wurarit ken kup-kakupka yindangir nomnonj gar ke utkunda mile dide singi b'iyena mile kȋma rinsi re Keriso Yesum pilind ebnya.

15 I Keriso Yesu ikonj onggit gowukoi wa re negir mile riga yirkokar okawa mana, si itemb yȋt re nony ijawa kȋma e dide komkesa riga wa ririrkipjog e imjatenam. I kon re negir mile riga wingirind mopyam e nibnyin koina omniki negir mile map.

16 Aji inaemb jȋ mop nangga pena God kear nomnonj, nokim da idenat Keriso Yesu Tina kupka musik wȋmena mile pitapita omny kor pilind, nangga ma jȋ da kon re negir mile riga wingirind mopyam na. I nokim da idenat Ton ket ken wingata rigam nitngau towanim yepiya ra menon okatenyi Ti pilwa Tin gar ke utkunda ke okatam dide ket dadal ngirpu kesa yirkokar okasi.

17 Si isnawa dide b'ogil inyomarena Ti pilwa ngirpu kesa ngirpu kesa yete re dadal ngirpu kesa

King yibim, i uj kesa dide yir ongong kesa yipaina
God yibim, iminjog.

Wingawinga ke B'ogil Geja Omnikam

18 Kor b'iga Timote! Kon mor pilnate onggityam b'ingawa yit oramisin re onggit God ma bage yit ririr nate rina re bageyamip naska kana apurento mor gatab. Nokim da idenat man wingawinga ke b'ogil geja omnikam metkenyit.

19 I win b'ogla waina gar ke utkunda mile dide b'ogil kukip ke nonykok amorkina. I ninda rigap re kea towaina onggityam b'ogil kukip ke nonykok ateakento i ket towaina gar ke utkunda mile re kea negir aukito.

20 I onggit riga wingirind kea de Imenayo ake Aleksandro ebnonda, i kon ten sosi ke eaukenond, si ket ton Satanamna yim kumb wa awonda, nokim da idenat ton bebig takateneninya dimdim awowim i ket maka Godind isadrena iyenza.

2

Sosind Yir Opmita Mile gatab Yit

1 Si onggit paemb kon naskajog men mutgoen da man b'ogla Godim pilwa komkesa riga wa gatab b'itenya oramitenyit i yir opmitena metkenyit i riga nyi tuwateninyit i dide siteket yit omnentyit.

2 Si man b'ogla odede nya ke towanim yir topmitenenyit, opi re king i dide komkesa ukoi nyi riga. Nokim da idenat men mumakesand dide ngimblanc wiwena tuwenyin Godind ewangaya milend dide yina milend komkesa gatab ke.

3 Si itemb re b'ogiljog mile e dide ririrkipjog mile e omnikam mera yirkokar okawayam Godim wipind.

4 I God singi e da komkesa rigap yirkokar okasi dide tuweny iminjog Tina yitkak wumir okatenam.

5 Mop nokip God re inta yipaina,
i dide inta yipaina inyinyam yir iyena riga God
dide riga ganggand,
it re Keriso Yesu yet re riga jiwim awonj.

6 Si itemb riga Keriso Yesu Tilenggyam negir mile
irabam b'akawonj komkesa riga wanim.
I Tina onggityam yir ungata mile aukonj re
Godimna obagendi winjog nat.

7 I onggit mop penaemb God nobagendonj Tina b'ogil yirkokar bage yit pitapita omnena rigam dide itmikitijog rigam. Si kon God ma obagiki kesa riga wanim ouyaena riga awond, nokim da idenat ton Kerisond gar ke utkunda ke okasi dide iminjog God ma yitkak okasi. Si kon re ma b'anyginenyina, aji iminjog yitkak im apureninyin.

8 Si onggit paemb kon itmikitijog riga nyi kima riga wa pilwa singi oramisin wanim omnikam da win riga b'ogla yina milend wimena tuwenyit komliu kesa dide yit b'ugwatena kesa, i ket Godim pilwa onggityam waina yina mile kima yim urowatena kima yir opmitena tuwenyit komkesa sosi b'eomapund.

9 I kongga daka b'ogla odede yipa wip nya ke wimena wowen. Si ton b'ogla towaina b'ajga auka gatab b'obogil b'ajga dide towalenggyam b'agoka wowen, dide ket odede nony menamena kima b'obogil kobirgim ke b'ikoka wowen. Aji goro

riga nony kesa omnām mopngii b'ijobika wowen, i gorō gold ke o b'ogil ngindngind timtim jag ke b'ajga wowen, i dide gorō ukoi wulkip kima b'ogiljog kobirgim ke b'ikoka wowen.

¹⁰ Aji ton b'ogla b'ogil mile omnikā ke b'ajga wowen. Mop nokip itemb re ririrkipjog mile im kongga wa omnikam yepim re b'agenairanj da, "Sin re Godind ewangaya kongga im."

¹¹ Si kongga b'ogla sosi wip iyoī riga wa pilwa b'akaena wowen komkesa gatab ke, i idenatemb ket mimkam ke b'auyaena tuweny.

¹² I kon ma opima kongga ten tenjikeneninyin riga ouyaenam dide riga wa kumbind danda ondratenam. Aji ton b'ogla mimkam ke wimena tuweny.

¹³ Mop nokip God naska Adam na yomnikonj, i onggit kak ke ket Ibind womnikonj.

¹⁴ I kwa Satanat ma Adam na rabem yomnonj, aji ti kongga na iminjogjog rabem womnonj, i ingkenaemb ket negir mile pita awonj.

¹⁵ Aji ra kongga odede milend wimena tuweny, opire gar ke utkunda milend i singi b'iyena milend i dide towalenggyam b'agoka kima yina b'amnena milend, dide ra ket ton b'iga ukka teyenanj Godimna oramiti bebig ririrind, si ingkaimemb ket ton yirkokar okasi.

3

Sosi Elda dide Diyakona Imda gatab Yit

¹ I ite re ji yit iminjog e da yet ra gar ke singi tainy sosi eldam, si ton b'ogla tina kupka gar yaramit isnawa kima b'ogil wiko omnikam.

2 Si onggit paemb elda rīga ra b'ogla odede rīga na ibim, i te re b'injawa kesajog rīga, i yipaina nena kongga kima b'ogil wimena rīga, i b'obogil nonyik b'amdena kima rīga, i tilenggyam b'agoka mile kima rīga, i b'ogil multekip ke nonyik b'amdena kima rīga, i rīga b'obogil obai omnena rīga, i dide b'obogil ouyaena rīga.

3 I kwa ton b'ogla odede rīga na ibim, yet ra maka ik onaika rīga ibim, i yet ra maka b'ipowa rīga ibim. Aji ton b'ogla ngolekak dide b'ipowa kesa rīga na ibim, i dide ton b'ogla maka wulkip singind ibim.

4 I ton b'ogla b'obogil wiip tamneniny tinajog b'igawar dide tinajog rīga yepim re wekeny tina metind, i ingkaemb ket tina b'igawariip tin yit utkundenyi komkesa gatab ke b'obogil isnawa kima.

5 Mop nokip yet ra maka ra wumir ibim ridede nya kae tinajog b'igawar wiip omnennam, si ridede nya kae ton kwa Godimna sosi yir ipka iyeny.

6 I ton goro sisil ai gar ke utkunda rīga ibim, nokip ton ke b'asourena milend yeken, i ket ke onggit b'asourena mile ke negir ma b'isagika yakat odede rīja na re Satana negir ma b'isagika yokatonj tina b'asourena mile ke.

7 Aji ton b'ogla odede rīga na ibim ya gatab im re rigap b'ogil yir ungata yit apurenanj yepim re sosi bau ke wekeny. Nokim da idenat ton maka rīga wa pilke negir yit okateny dide Satanamna disit maka tin okas.

8 I diyakona todaka b'ogla odede yipa wiip nya ke b'obogil isnawa kima rīga na tekeny. Si ton b'ogla maka nonytak ke opurena teyenanj, i ton b'ogla maka ik onaikand tekeny, i dide ton b'ogla maka

butum mile omni ka teyenanj.

9 I ton b'ogla odede riga tekeny yepiya ra towaina kukip ke nonykok kikkip kesa owama teyenanj, i kwa ton b'ogla Kerisond gar ke utkunda gatab kupka ouyaena yitkak danda kima emorka teyenenanj rina re naskand wigawiga egiti yibnonj riga wa pilke aji Godit Kerisom pilind pita yomnon.

10 Si ton b'ogla naska otonkena rakasinem rika ton ririr im diyakona wiko omnikam. I onggit kak ke rada ton b'injawa kesa ririrkip taukanj onggit diyakona wikom, si idenasimemb ket ton diyakona wiko tatomkanj.

11 I odede yipa wip nya ke diyakona waina konggawarip todaka b'ogla b'obogil isnawa kima kongga na tekeny. Si ton goro kwa odede kongga tekeny yepiya ra ninda riga wa gatab negir ugaga yit tapurenanj. Aji ton b'ogla b'obogil nonyik b'amdena kima kongga na tekeny dide komkesa gatab ke nony ijai kongga na tekeny.

12 I kwa diyakona b'ogla yipaina nena kongga kima b'ogil wimena riga na tekeny, dide ton ket b'ogla b'obogil wip tamnenanj towainajog b'igawar dide towainajog riga yepim re wekeny towaina metind.

13 Mop nokip ra ton b'obogil diyakona wiko omni ka teyenanj, si ton towalenggyam opima b'ogil isnawa takatenanj yipand sosi kima, dide ton opima mog a kesa ukoi danda kima towinkanj Keriso Yesund gar ke utkunda milend.

Sosi dide Iminjog Yitkak

14 I kon win e yir ungawa yiyyenin wanakana menonim mor pilwa. Aji kon naska e onggityam leta mor mirikaen.

15 Nokim da ra kor win nitulitau mor pilwa menonim, si idenat man onggit leta ke wumir okasit ridede im rigap b'ogla mile omnika teyenanj Godimna metind. Si itemb met re yilo wimena Godimna sosi e. I itemb Godimna sosi re iminjog yitkak ke imninenka kesa orangi e, si onggit paemb sosi wingirind komkesa gar ke utkunda rigap b'ogla itemb iminjog yitkak b'obogil danda kima irmeka ye yene odede ringmim re rortep met danda kima irmeka eyenanj.

16 I itemb re ma b'arkena kima e, aji pita nate da onggityam meraina Godind ewangaya mile re ukojog wigawiga mile e. Si itemb ji wigawiga Godind ewangaya mile.

Si Keriso re kea rigaina ji ke pita awonj.

I Yinayina Wingawingat Tin pitapita yomnonj da, “Ton re negir kesa dimdimjog riga e.”

I kwa anerup kea Tin yir yongo.

I rigap kea Tin pitapita yomneno komkesa b'engabenga yitam wingirind,
dide ket kea rigap Tin gar ke utkunda ke yokateno yepim re wekeny onggit gowukoyind.

I dide ket God b'ogil inyomarena kima Tin yurowatonj pumb tungg wa.

4

Nonony Yitkak B'anyginena Ouyaena Riga gatab

1 Aji Yinayina Wingawinga pitakip nate yindenya da yimta ke ninda rigap opima Kerisond gar ke utkunda mile ke tewaikenanj dem dide

ket b'atkaenanj dem b'anyginena wingawinga wa pilwa dide negir wingawinga waina ouyaena wa pilwa.

² Si opimemb ouyaena riga re gim ke b'ogil aji ngor wa negir mile ke b'anyginena ouyaena riga im, nokip towaina kukip ke nonykokind re dadal negir wingawinga waina outinti mal oramiti im wekeny odede ringma ra rigat tina wiko rigam pilind ayin imbriki ke tinim outinti mal oramis.

³ Si odede b'anyginena ouyaena rigap opima riga ogoka teyenanj dem da, "Goro leo o kongga b'imda tuwenim." I kwa ton opima ingaena teyenanj ninda owou uwabikam. Aji God onggityam owou atobarkinonj re owowim imda mana. Si men gar ke utkunda riga yepim re Godimna iminjog yitkak wumir okati wekenyin, men b'ogla Godind siteket yit kima owou teyenindam.

⁴ Mop nokip komkesa Godimna otobarki gasa re b'ogiljog im, si makwa ita yipa gasa b'iskam yibim. Aji men b'ogla Godind siteket yit omnena kima komkesa gasa takatenindam.

⁵ Nokip God komkesa gasa yinam amneniny re Tina yitkak kae dide meraina b'iten a kae.

Kerisomna B'ogil Wiko Riga

⁶ Ira man gar ke utkunda nany dide yingganwar odede yit tamneninyit b'obogil wumir omnena kima, i ingkaemb man moina tabind wiko ririrkip omnicket. Si idenat man ket taet Keriso Yesumna b'ogil wiko riga. I ingkaemb man molenggyam b'angenga metkenyit gar ke utkunda gatab iminjog yitkak ke dide b'ogil ouyaena ke rinte re man yimta undoka yiyyenyit.

7 I man b'ogla odede ijongki kakyit bond tepenenyit rinsim re yina mile kilkil omnika eyenanj. Aji man b'ogla molenggyam wingawinga ke b'ogil milend kao b'itninenam metkenyit, nokim da idenat man b'obogil Godind ewangaya riga taet.

8 Mop nokip ji ke kao b'itninenam milem re opima ngai tida sobijog b'ogil isma gasa. Aji Godind ewangaya mile ke kao b'itninenam re opima komkesa gatab ke b'ogiljog isma gasa. Si onggityam b'ogiljog isma gasa re Godimna tirir omni yit kima im rinsim re yunim yirkokarim b'ogil aukanj dide kwa rinsim ra warim yirkokarim b'ogil taukanj.

9 Itemb yit re nony ijawa kima iminjog yitkak e, si komkesa riga wa ririrkipjog e okatenam.

10 Si onggit mop paemb men b'asowa wuwenyin dide b'idgotnena akatenindam. Mop nokip men opima yilo wimena Godim pilind warim b'ogil isma oramka eyenindam. Si itemb God re komkesa riga wa yirkokar okawa riga e, aji gar ke utkunda riga wanim re dadal ngirpu kesa yirkokar okawa riga e.

11 Si man b'ogla odede yit ke riga tengaeninyit dide b'obogil ouyaena teyeninyit.

12 Igoro yet men merinen nokip man re sisil riga et. Aji man b'ogla odede mile ke b'ogil wingata riga na taet gar ke utkunda riga wanim, opi re yitkak opurena mile ke, i yirkokar wimena mile ke, i singi b'iyyena mile ke, i gar ke utkunda mile ke, i dide kilkip kesa mile ke moina omnika wingirind dide nony menamena wingirind.

13 Si man b'ogla odede milend kinyir aena metkenyit, opi re da man riga wa yina peba

ogenka teyenainyit, i riga ugowa teyeninyit gar ke utkundand onyitam, i dide man b'obogil God ma yit ke riga ouyaena teyeninyit.

¹⁴ I man goro onggityam yiyyag wurar nony b'etidatenim rinte re mor pilind yibim. Si man Godimna bage yit kena onggityam yiyyag wurar yokatot, re elda rigap mor pilind yim aramkito mornim danda okawam.

¹⁵ Si man b'ogla onggityam komkesa mile itaikena teyeninyit, i kwa molenggyam b'atkaenyit onggityam mile itaikenam. Nokim da idenat komkesa rigap pitakipind yir tangranj moina mile rinsim re danda kima b'ogil auka wuweny.

¹⁶ I man b'ogla molenggyam dide moina ouyaena gatab b'obogil yir b'itiyeniyit. Si man b'ogla onggityam mile dimdim omnikand metkeniyit, mop nokip ra man odede omnikand metkeniyit, God ita mor yirkokar motkau, i dide kwa Ton opima towa yirkokar takainy yepiya ra men yit utkundena mitiyenyi.

5

Sosi Riga Wip Omnenaga gatab Yit

¹ I man goro midmid danda kima samany iyowa teyeninyit, aji ija na wip ngimbla kima tugoinyit da ton re moinajog b'uwar im. I man b'ogla ija na wip sisil riga tamneninyit da ton re moinajog nanywar im o yingganwar im.

² I man b'ogla molegmoleg ija na wip tamneninyit da ton re moinajog mogwar im dide kwa man sisil kongga ija na wip kupka kilkip kesa nony

menamena kima tamneninyit da ton re moinajog ngimirwar im.

³ I man b'ogla odede mik kongga isnawa teyeninyit yepim re tentajog wekeny.

⁴ Ají rada opima mik konggamna b'igawar o dadwar wekeny, ton b'ogla naska b'atouyaenanj ridede im ton Godind ewangaya mile omnika teyananj towainajog b'u ake mogwar o dadwar wa pilwa yepiya re ten oraka dide ukka teito, dide ket todaka ten mira yir ipka teyananj. Mop nokip itemb mile re ririrkipjog mile im Godim wipind omnikam.

⁵ Ají tentajog wimena mik konggap re Godim pilnate warim b'ogil isma yoramitenyi dide ket ipendi kesa bibir dide siwiny Godind igekena yiyyenyi dide yir opmitena wuweny.

⁶ I odede mik kongga yepim re gowukoi sam mile singind wimena wuweny, ton re yilo im wekeny, ají wingawinga ke re uj im wekeny.

⁷ Si man b'ogla riga tengaeninyit onggit yit ke, nokim da idenat komkesa riga b'injawa kesajog tekeny Godim wipind.

⁸ Ají yet ra maka yirik unjomkena teyeniny tina jog kus riga, ají ukoijog re tinajog b'u ake mog dide dadwar, ton re kea gar ke utkunda mile yoeny. Si ton re ukoijog negir mile riga e, ají ma ija e it re gar ke utkunda kesa riga re dide.

⁹ I man b'ogla odede mik kongga nena moina peband nyi oramka teyeninyit sosit ten yim okaenam yepim re siksti (60) kemag kima o pumb wa dide yipaina leo okati mik kongga.

¹⁰ I ton kwa b'ogla ongwati na tekeny odede towaina b'ogil wiiko omnika mile gatabim,

opi re da ton towaina b'igawar b'obogil yir epkenento, i ton towaina met wa riga b'obogil obai amnikenento, i ton yina riga b'obogil yim akaenento, i ton riga yim b'obogil akaenento yepiya re b'idgotnenand wekenenonj, i dide ton komkesa b'engabenga wip b'ogil mile omnikand b'akaenento.

¹¹ Aj̄i man b'ogla b'itisaet sisil mik kongga nyi oramkam moina peband, mop nokip onggit wiñind ra ton towaina garind pil b'asopaya singi tepindenanj, ton ita Kerisond kak iaenyi dide ket singi taenanaj leo okatam.

¹² Si ton opima b'isagika takatenanj, mop nokip ton kea towaina naska tirir omni yit yerbeko rina re ton endento da ton makwa opima leo temdanj aj̄i Keriso nena e yimta undoka iyenyi.

¹³ I kwa daka ton b'auyaena wuweny dinder wimena milend dide ket wiñ esomnena kima metta metta wuweny. I ton ma odede dinder wimena nena e yokatenyi, aj̄i ton kwa b'ugaga milend wuweny, i jabakipind ninda rigaina wiñ gatab ngimbla kima yit opurena eyenanj, i dide ton yitkak opurena eyenanj rinsim re towanim makwa ririrkip im opurenam.

¹⁴ Si onggit paemb kon singi en da sisil mik kongga b'ogla leo kima raukinem, i ton b'ogla b'iga rukukinem, i ton b'ogla towainajog b'ubigawar b'obogil yir repkinem, i dide goro geja riga wa ril okatenam gangga rakaeninem ten negir yit omnenam.

¹⁵ Mop nokip kea ninda mik konggap sosi kak yiaeno dide ket Satanand yimta undoka iyenyi.

¹⁶ I rada yipa gar ke utkunda konggam opima

mik kongga wibnainy tina kus riga wingirind, si ton b'ogla ten yim rakaenin aji goro sosit towaina bebig rurowatenin. Nokim da idenat sosit daka tentajog wimena mik kongga yim takaeniny.

17 I elda yepiya ra b'obogil towaina tabind wiko omnika teyenanj, si sosi rigap b'ogla ninda nya ke mira ogona kima nimogpyam towa ukoi kana isnawa takaenanj, aji ukoijog re towanim mim yepiya ra b'asowa tuweny yitkak pitapita omne-nam diide ouyaenam.

18 Mop nokip yina pebat ija emb ji onggit riga gatab yindenya da, “I onggit winind ra kau owoukip eringokand ibim, goro man kau tugimind ut-wangkapu gasa ikitim ogokam da goro owou tawinim.” I kwa daka yindenya da, “Itemb re ririrkipjog e ra wiko rigat tina mira takateniny.”

19 I man goro elda riga gatab sosind kot omnikam yit imjateniyit, ra maka ra nimog o nowa yir ungata riga taukanj onggit towaina b'injawa gatab.

20 I yepiya ra negir mile omnika teyenanj, man b'ogla komkesa sosi riga wa wipind ten samany iyowa teyeninyit da, “Nangga paim win odede negir mile omnika eyenindam?” Nokim da idenat ninda rigap daka moga okatenyi Godim wipind odede negir mile gatab.

21 I kon kupkakupka danda kima men mitngaen Godim wipind i Keriso Yesum wipind i diide Godimna obagiki yina aneru wa wipind, da man b'ogla onggityam yitkak b'obogil dimdim yimta tundokinyit, aji goro mor nony ke riga ikalka teyeninim diide goro bu b'iyena mile ke isagika teyeninyit.

22 I goro man wanakana isanikesa yipa rigam pilind yim taramisinyit sosim wīko riga nyi okawam. Si ra man tina negir mile ongwati kesand wanakana yim taramisinyit, si ingkaemb man ket tina onggityam negir mile yingg takateninyit. Si goro man odede nya ke ninda rigaina negir mile yingg takateninim. Aji man b'ogla onggityam mile dimdim nya ke tamnikeninyit, si ingkaemb man b'injawa kesa kilkip kesa milend mitibnyit.

23 I man goro nyi nena tanaikeneninim, aji b'ogla ngai sobijog sobijog ik tanaikeneninyit kopa awir omniam, nokip moina kom re ma danda e dide man ita ita winind kopa aukenenyit.

24 I ninda rigaina negir mile re pitakip nasim aukenenanj, si ton naska kana im b'isagika okatam wuweny. I ninda rigaina negir mile re ma odede pitakip nasim aukenenanj, aji towaina negir mile todaka opima yimta ke pita taukanj dem b'isagika okatam.

25 I b'ogil mile omnika todaka odede yipa wip nya kaim aukenenanj. Si ninda re naska kana im pitakipind aukenenanj, aji ninda todaka makwa ririrkipjog isnawa rigam ramneninem. Nokim da idenat maka yipa rigat Godimna nyi dide sowaina Tina yitkak ouyaena gatab isadrena teyeniny.

6

1 I komkesa wīko riga yepim re towaina yonggyamwar waina danda wirand wekeny, ton b'ogla towainajog yonggyamwar wa komkesa nya ke ririrkipjog isnawa rigam ramneninem. Nokim da idenat maka yipa rigat Godimna nyi dide sowaina Tina yitkak ouyaena gatab isadrena teyeniny.

2 I rada wiko riga wa gar ke utkunda yonggyamwar tebnauranj, ton goro maka towa yonggyamwar b'obogil resnaeninem, nokip ton re towa gar ke utkunda nanywar im o yingganwar im. Aji ton b'ogla towaina wiko rigamna wiko b'obogil omnika reyeninem towa yonggyamwar wa. Mop nokip towa yonggyamwar yepim re towaina b'asowa ke b'ogil akatenanj, ton re gar ke utkunda riga im dide towaina singi iyena riga im. Si man insimemb yitkak riga ouyaena teyeninyit dide ugowa teyeninyit yimta undokam.

Nonony Yitkak Wulkip Singi Iyena gatab

3 I ninda b'anyginena ouyaena rigap opima b'enga wiip ouyaena eyenanj sosi wa. Si towaina ouyaena re ma opima mera Yonggyam Yesu Kersomna imminena kesa iminjog yitkak kima dide Godind ewangaya ririrind ouyaena yitkak kima yipand b'obogil b'imjatenanj.

4 I ton ket b'asourena wuweny dide ket ton makwa opima nangga wumir im awamanj, aji ton singi aenanaj re ninda yitkak gatab yit b'ipatena mile mim dide yit b'ugwatena mile mim. I ingkaimemb ket odede mile pita aukenenanj, opi re nonyik b'iponena mile, i b'ipowa mile, i isadrena mile, i dide negirjog nonyik iponena mile.

5 Si opimemb b'anyginena ouyaena rigaina gar re kupka itkikijog im wekeny, si ton ita winind bebig kima yit b'ugwatena mile omnika eyenenanj. I God ma iminjog yitkak re awir e kwa yibim towa pilind. I ton ija im nony menamena omnika eyenanj da Godind ewangaya mile re wulkip imdam nya e.

6 Aji yepim re towaina gasa kima nony ririrkip wekeny rinsim re ton awamanj, si itemb Godind ewangaya mile re towanim ukojog b'ogil imdam nya e.

7 Mop nokip re men ukuktondam onggit gowukoi wa, men maka nangga gasa na teitondam. I kwa ra men uj taukindam, si men makwa ririr im men kima nanggamog gasa iyoyim.

8 Si rada mera opima owou dide kobirgim wekeny ingaenam, men opima nony ririrkip tainindam onggit gasa ke.

9 I yepim re singi aenanaj jogjog gasa kima riga awowim, ton isendenanj re negir ma otonkena wa im i dis wa im i dide jogjog korirkorir dide negir guda kima singi wa im. Si odede milepim ten negir amnikenenanj dide eomnenenanj.

10 Mop nokip wulkip singi iyena mile re komkesa b'engabenga wip negirjog milemna rigib e. Si ninda rigap re kea gar ke utkunda mile yirarenyi, nokip ton singi aenanaj re wulkip usausapyam tumind angurka mim. I kwa ton ket towalenggyam jogjog gar kopa ke sejgarsejgar auka wuweny towaina garind.

Polimna Kikitumam B'ingawa Yit

11 Aji man re Godimna riga et, si man b'ikene onggityam mile wa pilke. Aji man b'ogla egaregar riga na mitibnyit odede mile orakam, opi re negir kesa dimdimjog mile, i Godind ewangaya mile, i gar ke utkunda mile, i singi b'iyena mile, i mimkam wimena mile, i dide nony kima musik wimena mile.

12 Si man b'ogla b'obogil geja omnika yiyene gar ke utkunda milend danda kima onyitam. I ingkaemb ket man okasit dadal ngirpu kesa yirkokar. Si God re onggit manaemb men mobagendonj. I kwa man onggit manaemb b'ogil imjati yit ke b'agenayot Kerisond gar ke utkunda gatab jogjog yir ungata riga wa wipind.

13 I kon men mitngaen Godim wipind yete re komkesa gasa wa yilo ogona eyeniny i Keriso Yesum wipind yet re b'obogil b'agenayonj re ton yir ungata yit yopulitonj Pontiyo Pilatom pilwa.

14 Si man b'ogla onggityam b'ingawa yit kilkip kesa dide b'injawa kesa owama iyenyit, ngirpu mera Yonggyam Yesu Keriso pita tainy dem.

15 I God yete re b'ogilim rigib riga dide yipaina dandam rigib riga yibim, Ton ita Tinajog obagendi winind Kerisond pita omny dem. I God re komkesa king wa King e dide komkesa yonggyam wa Yonggyam e.

16 I God re inta yipaina riga yibim yet ra maka uj tainy. I Ton wimena yikeny re ngaya nate rinte ra rigat ma ririr e yik wus wa. I makwa ke yipa rigat Tin yir yongonj dide kwa makwa yipa rigat ririr e Tin yir ongongim. Si isnawa dide danda Ti pilwa dadal ngirpu kesa, iminjog.

17 I man b'ogla odede riga tengaeninyit sosind yepim re yu onggit gowukoyind jogjog gasa kima wekeny. Si ton goro towalenggyam pumb wa b'urowateninem towaina jogjog gasa map. I kwa ton goro warim b'ogil isma raramiteninem gowukoi gim ke gasa wa pilind rinsim ra maka pinjog tekeny. Ajì ton b'ogla warim b'ogil isma raramiteninem Godim pilind yete re mera

komkesa gasa ririrkipjog ogona niyeneniny sam kima ngolengole aenam.

18 I ton kwa b'ogla b'ogil esourena kima wikö omniķa reyeninem, dide ton kwa b'ogla b'ogil wiķo ririrkipjog omniķa reyeninem. I kwa ton b'ogla ngolekak waken towaina gasa b'obogil ogo-nam ingaena gasa kesa riga wa, dide b'angonyjeni waken gasa yingg iyenam rinsim ra God ogona teyeniny.

19 Si ton odede mile kaimemb towalenggyam wingawinga ke b'ogil gasa angurka teyenanj dide ket imninena kesa danda kima met orangapu pipmet ongonyjena teyenanj warim yirkokar wimenam. Nokim da idenat ton onggityam iminjog yirkokar okasi dem de pumb tungg wa.

20 Timote-wii, man b'obogil gasa yir tepkinyit rina re God nony b'ijawa kima mor mogonionj yirgong omnikam. I kwa man ewaikena metkenyit kip kesa korirkorir yit b'ipatena mile wa pilke rinsim ra riga Godind ewangaya kesam tamneniny, i dide b'anyginena wumir kima yit b'ugwatena mile wa pilke rinsim ra Godimna iminjog yitkak gejam omnenyi.

21 I ninda rigap kea pitapita aenanj da ton kea onggityam b'anyginena wumir yokateno. Si ton odede nya kenaemb gar ke utkunda milem pilke ewaikento.

Godimna wurar win kima.

**Wipi Yit God ma Yina Sisil Yina Peba
The New Testament in the Wipi Language of Papua
New Guinea
Nupela Testamen long tokples Wipi long Niugini**

Copyright © 2001 The Bible Society of Papua New Guinea

Language: Wipi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-10-13

PDF generated using Haiola and XeLaTeX on 28 Dec 2024 from source files
dated 31 Aug 2023

a5a5213a-fb12-52b5-9c99-efb8044c6646